

五

倫

書

五倫書卷之五十二

臣道

善行

廉介

商伊尹耕於有莘之野而樂堯舜之道焉。非其義也。非其道也。祿之以天下。弗顧也。繫馬千駟。弗視也。非其義也。非其道也。一介不以與人。一介不以取諸人。

伯夷非其君不事。非其友不友。不立於惡人。

之朝。不與惡人言。立於惡人之朝。與惡人言。如以朝衣朝冠。坐於塗炭。推惡惡之心。思與鄉人立。其冠不正。望望然去之。若將浼焉。是故諸侯雖有善其辭命而至者。不受也。列國。魯柳下惠不以三公易其介。

季文子相宣成。襄三公。無衣帛之妾。無食粟之馬。仲孫它諫曰。子為魯上卿。相二君矣。妾不衣帛。馬不食粟。人其以子為愛且不華國乎。文子曰。吾亦願之。然吾觀國人。其父兄之

食簾而衣惡者猶多矣。吾是以不敢。人之父兄食簾衣惡而我美妾與馬。無乃非相人者乎。且吾聞以德榮為國華。不聞以妾與馬文子以告孟獻子。獻子囚它七日。自是它之妾衣不過七升之布。馬餼不過稂莠。文子聞之曰。過而能改者民之上也。使為上大夫。公儀休為相。奉法循理。使食祿者不得與下民爭利。受大者不得取小。時客有遺休魚者。休不受。客曰。聞君嗜魚。遺君魚。何故不受也。

休曰。以嗜魚故不受也。今為相能自給魚。今受魚而免。誰復給我魚者。吾故不受也。食茹而美。拔其園葵而棄之。見其家織布好而廢。出其家婦。燔其機。云欲令農士工女安所售其貨乎。

宋子罕為司城時。宋人有得玉獻諸子罕。子罕弗受。獻者曰。以示玉人。玉人以為寶也。故敢獻之。子罕曰。我以不貪為寶。爾以玉為寶。若以與我。皆喪寶也。不若人有其寶。獻者稽

首而告曰。小人懷璧不可以越鄉。納此以請死也。子罕寘諸其里。使玉人爲之攻之而後使復其所。

齊晏嬰朝乘弊車。駕驂馬。景公見之曰。嘻。夫子之祿寡耶。何乘不任之甚也。嬰對曰。賴君之賜得以壽三族及國交遊皆得生焉。臣得煖衣飽食。弊車驂馬以奉其身於臣足矣。嬰出。公使梁丘據遺之輅車乘馬。三返不受。公不悅。趣召嬰。嬰至。公曰。夫子不受寡人亦不

乘嬰曰。君使臣臨百官之吏。節其衣服飲食之養。以先齊國之人。然猶恐其侈靡而不顧其行也。今輅車乘馬。君乘之上。臣亦乘之下。民之無義侈其衣食矣。公從之。

漢。祭遵為人廉約。小心克己。奉公賞賜。輒盡與士卒。家無私財。身衣韋襜布被。夫人裳不加緣。光武以是重焉。

宣秉。光武時為司隸校尉。性節約。常服布被。蔬食瓦器。帝嘗幸其府舍。見而歎其賢。賜布。

帛帳帷什物。後為大司徒司直。所得祿俸。輒以收養親族。其孤弱者。分與田地。自無儋石之儲。

王良為大司徒司直。在位恭儉。妻子不入官舍。布被瓦器。司徒史鮑恢到東海。過候其家。良妻布裙曳柴。從田中歸。恢告曰。我司徒史也。欲見夫人。妻曰。妾是也。恢乃下拜。歎息而還。

孔奮守姑臧。長姑臧稱為富邑。奮力行清潔。



隴蜀既平。河西守令咸被徵召。財貨連轂。彌  
竟山澤。奮單車就路。姑臧吏民及羌胡更相  
謂曰。孔君清廉仁賢。舉縣蒙恩。遂相賦歛牛  
馬器物千萬以上。追送數百里。奮謝之而已。  
一無所受。奮供養老母極膳。妻子但食葱菜。  
或嘲奮曰。置脂膏中。不能自潤。而奮不改其  
操。

鍾離意。明帝時為尚書。時交趾太守張恢坐  
贓伏法。詔以資物班賜群臣。意得珠璣悉以

委地而不拜。賜。帝怪問其故。對曰。臣聞孔子忍渴於盜泉之水。曾參回車於勝母之間。惡其名也。此賊穢之寶。誠不敢拜。帝嗟歎曰。清乎尚書之言。乃更以庫錢三十萬賜意。

楊震安帝時為東萊太守。當之郡。道經昌邑。故所舉荊州茂才王密為昌邑令。懷金十斤以遺震。震曰。故人知君。君不知故人。何也。密曰。暮夜無知者。震曰。天知。地知。我知。子知。何謂無知。密愧而去。後轉為涿郡太守。子孫常

五倫書卷五十二  
五  
蔬食步行。故舊或勸為開產業。震曰：「使後世稱爲清白吏子孫，以此遺之，不亦厚乎？」

楊秉震之子。歷豫、荆、徐、兗四州刺史。遷任城相。自爲刺史二千石，計日受俸，餘祿不入私門。故吏齎錢八萬遺秉，閉門不受。以廉潔稱。晉胡威、荊州刺史質之子，爲徐州刺史，厲操清白。勤於政術，風化大行。初，質爲荊州，威自京都省之。家貧，無車馬，僮僕威自驅驢，單行。每至客舍，躬放驢，取樵炊爨，爨食畢，復隨侶進道。

既至見父停廐中十餘日告歸父賜絹一匹  
為裝威跪曰大人清白不審於何得此曰是  
吾俸祿之餘以為汝糧耳威受之辭歸質帳  
下都督先威未發請假還家陰資裝於百餘  
里要威為伴每事佐助行數百里威疑而誘  
問之既知乃取所賜絹答謝而遣之後因他  
信具以白質質杖都督一百除吏名其父子  
清白如此晉武帝賜見語及平生帝歎其父  
清謂威曰卿清孰與父清威對曰臣不如也

帝曰。卿父以何為勝耶。對曰。臣父清恐人知。臣清恐人不知。是臣不及遠也。

鄧攸。元帝時為吳郡守。載米之郡。俸祿無所受。唯飲吳水而已。後稱疾去職。郡常有送迎錢數百萬。攸去郡不受一錢。百姓數千人牽攸舡不得進。攸乃小停。夜中發去。吳人歌之曰。鄧侯挽不留。謝令推不去。

吳隱之。遷晉陵太守。在郡清儉。妻自負薪。還左衛將軍。雖居清顯。祿賜皆班親族。冬月無

被嘗澣衣。乃披絮。勤苦同於貧庶。再為廣州刺史。地名石門有水曰貪泉。飲者懷無厭之欲。隱之既至泉所。酌而飲之。因賦詩曰。古人云。此水一軟懷千金。試使夷齊飲。終當不易心。及在州。清操踰厲。常食不過菜及乾魚而已。歸舟之日。裝無餘資。拜度支尚書太常。以竹蓬為屏風。坐無檀席。遷中領軍。初得祿。裁留身糧。其餘悉分振親族。家人紡績以供朝夕。時有困絕。或并日而食。身恒布衣不完。妻

子不露寸祿

南宗孔覲仕至廷尉卿御史中丞。性貞素不尚矯飾。弟道存從弟徽頗營產業。二弟請假東還。覲出渚迎之。輜重十餘船。皆綿絹紙席之屬。覲見之。偽喜謂曰。我比困乏。得此甚安。因命上置岸側。既而正色謂道存等曰。汝輩忝預士流。何至作賈客邪。命取火燒之。後道存代覲為後軍長史。江夏內史。時東土大旱。都邑米貴。一斗將百錢。道存遣吏載五百斛米。

餉覬覬謂吏曰。我在彼三載。去官之日。路糧不辦。二郎至彼未幾。那能便得此米邪。可載米還之。吏曰。都下米貴。乞於此貨之。不聽。吏乃載米而去。

齊劉懷慰。太祖置齊郡於京邑。乃治瓜步。以懷慰為太守。懷慰至郡。不受禮謁。民有餉其新米一斛者。懷慰出所食麥飯示之曰。旦食有餘。幸不煩此。因著廉吏論以達其意。帝聞之。手勅褒賞。



北齊表聿脩為尚書郎十年。未嘗受升酒之遺。尚書邢邵與聿脩舊款。每省中語戲。常呼聿脩為清郎。太寧初。聿脩以太常少卿出使巡省。仍令考校官人得失。經兗州時。邵為刺史。別後送白紬為信。聿脩不受。與邵書云。今日仰遇有異常行。瓜田李下。古人所慎。願得此心。不貽厚責。邵亦欣然領解。報書云。老夫忽忽。意不及此。敬承來旨。吾無間然。弟昔為清郎。今日復作清卿矣。

後周裴俠為河北郡守。躬履儉素。愛民如子。所食惟菽麥鹽菜而已。郡舊制有漁獵夫三十人。以供郡守。俠悉罷之。又有民丁三十人。以供役使。俠不以入私。並收庸直為官市馬。歲月既積。馬遂蕃息。去職之日。一無所取。俠嘗與諸牧守俱謁太祖。命俠別立。謂諸牧守曰。裴俠清慎奉公。為天下最。今眾中有如俠者。可與俱立。眾皆默然。無敢應者。乃厚賜俠。朝野嘆服。號為獨立使君。

隋趙軌為齊州別駕。其東鄰有桑甚落其家。軌遣人悉拾還其主。因誡諸子曰。吾非以此求名。意者非機杼之物。不願侵人。後徵入朝。父老相送者各揮涕曰。別駕在官。水火不與百姓交。是以不敢以壺酒相送。公清若水。請酌一杯水奉餞。軌受而飲之。

房彥謙歷齊州錄事參軍。司隸刺史。卒。涇陽令。前後居官所得俸祿。皆以周恤親友。家無餘財。雖致屢空。怡然自得。嘗從容獨笑。顧其

子玄齡曰。人皆因祿富。我獨以官貧。所遺子孫。在於清白耳。

唐屈突通嘗為行軍元帥長史。從太宗平薛仁果時。珍物山積。諸將皆爭取之。通獨無所犯。高祖聞而謂曰。公清正奉國。著自始終。名下定不虛也。特賜金銀六百兩。綵千段。

皇甫無逸。高祖時拜民部尚書。出為同州刺史。徙益州大都督府長史。所至輒閉閣不通賓客。左右無敢出入者。所須皆市易。它境常

按部宿民家。鐙炷盡。主人將續進。無逸抽佩刀斷帶為炷。其廉介類如此。

賈敦頤。貞觀中遷滄州刺史。在職清潔。每入朝。盡室而行。唯弊車一乘。羸馬數疋。銜勒有開。以繩為之。見者不知其刺史也。

韋夏卿。代宗時為吏部侍郎。時從弟執誼在翰林。嘗受人金。有所干請。密以金內夏卿懷中。夏卿不受。曰。吾與爾賴先人遺德致位。及此。顧當是哉。執誼大慙。

段秀實德宗時為司農卿初秀實自涇州被  
召戒其家曰若過岐朱泚必致贈遺慎毋納  
至岐泚固致大綾三百家人拒不遂至都秀  
實怒曰吾終不以汙吾第以置司農治堂之  
梁間吏後以告泚泚往取視之其封帕果皆  
完新

陸贄調鄭尉罷歸壽州刺史張鎰有重名贄  
往見語三日鎰奇之請為忘年交贄既行餉  
錢百萬鎰曰請為母夫人一日費贄不納止

受茶一串。曰。敢不承公之賜。

錢徽。憲宗時遷庶子。時韓公武以賂結公卿。遺徽錢二十萬。不納。或言非當路。可無讓。徽曰。取之在義。不在官。時稱徽有公望。

宋曹彬。初在周。世宗時。嘗使吳越。致命訖。即還。私覲之。禮一無所受。吳越人以輕舟追遺之。至於數四。彬猶不受。既而曰。吾終拒之。是近名也。遂受而籍之以歸。悉上送官。世宗強還之。彬始拜賜。悉以分遺親舊。而不留一錢。

范質太祖時登相位。以廉介自持。未嘗受四方饋遺。前後所得祿賜。多給孤遺。閨門之中。食不異品。身歿家無餘貲。帝因論輔相。謂侍臣曰。朕聞范質止有居第。不事生產。真宰相也。

沈倫為隨軍水陸轉運使。從王全斌伐蜀。清廉無欲。偽蜀群臣以珍異奇巧為獻。倫皆拒之。蜀平。東歸之日。篋中所有。惟圖書數卷而已。太祖知之。擢為樞密副使。



劉溫叟為御史中丞。有清操。太宗在晉邸。聞其清介。遣吏遺錢五百千。溫叟受之。貯廳西舍中。令府吏封署而去。明年重午。又送角黍執扇。所遣吏即送錢者。視西舍封識宛然。還以白帝。帝曰。我錢尚不用。况他人乎。昔日納之。是不欲拒我也。今周歲不啓封。其苦節愈見。命吏輦歸邸。

王禹偁為翰林學士。嘗草李繼遷制。繼遷送馬五十疋潤筆。禹偁却之。及知滁州。閩人鄭

褒徒步來謁。禹偁愛其儒雅。為買一馬。或  
買馬虧價者。太宗曰。禹偁能却。繼遷五十馬。  
顧肯虧一馬價哉。

李沆為宰相。自奉甚薄。所居陋巷。廳事無墀  
門。頽垣敗壁。不以屑慮。堂前藥欄壞。妻戒守  
舍者勿葺。以試沆。沆朝夕見之。經月終不言。  
妻以語沆。沆笑謂其弟維曰。豈可以此動吾  
一念哉。及治居第於封丘門內。廳事前僅容  
旋馬。或言其太隘。沆笑曰。居第當傳子孫。此

為宰相廳事誠隘。為太祝奉禮廳事已寬矣。  
畢士安真宗時為宰相。雖貴奉養無異平素。  
未嘗殖產為子孫計。故天下稱其清。王旦嘗  
面奏曰。畢士安仕至輔相。而四海無田園居  
第。沒未終喪。家用已屈。今其妻貸於臣家。其  
不負陛下可見矣。

包拯徙知端州。州歲貢硯。前守緣貢率數十  
倍以遺權貴人。拯命製者。纔足貢數。歲滿不  
持一硯歸。

杜衍。仁宗慶曆中為相。苞苴貨賄。不敢到其門。時號清白宰相。

趙抃。仁宗時。改益州轉運使。蜀地遠。民弱。吏肆為不法。州郡公相餽餉。抃以身帥之。蜀風為變。後再知成都。神宗立。召知諫院。及謝。帝曰。聞卿匹馬入蜀。以一琴一鶴自隨。為政簡易。亦稱是乎。

劉恕。神宗時。官至秘書丞。家貧。至無以給。旨甘。一毫不妄取於人。其自洛陽南歸也。時已

十月無寒具。司馬光以衣襪一二事及舊貂褥  
賁之。固辭。強與之。行及潁州。悉封而返之。

元。賁居貞甫冠。為行臺從事。時法制未立。人以  
賄賂相交結。有餽黃金五十兩者。居貞卻之。  
太宗聞而嘉歎。勅有司月給白金百兩。以旌  
其廉。中統元年。授中書左右司郎中。從世祖  
北征。帝問郎俸幾何。居貞以數對。帝謂其太  
薄。勅增之。居貞辭曰。品秩宜然。不可以臣而  
紊制。劉秉忠奏。居貞為叅知政事。又辭曰。他

日必有由。郎官援例求執政者。將何以處之。不拜。

許衡嘗暑中過河陽。暍甚。道有梨。衆爭取啖之。衡獨危坐樹下自若。或問之。曰。非其有而取之。不可也。人曰。世亂此無主。曰。梨無主。吾心獨無主乎。衡家貧。躬耕。粟熟則食。粟不熟則食糠覈菜茹。處之泰然。謳誦之聲聞戶外。如金石。財有餘。即以分諸族人及諸生之貧者。人有所遺。一毫弗義。弗受。

鄭制宜。世祖時為樞密院判官。遷湖廣行省。參知政事。陛辭。帝曰。汝父死王事。賞未汝及。近者要束木。伏誅。已籍沒其財產人畜。汝可擇其佳者取之。制宜對曰。彼以賊敗。臣復取之。寧無汙乎。帝賢其所守。賜白金千兩。

張雄飛。世祖時累官至參知政事。嘗坐省中。詔趣召之。見於便殿。謂曰。聞卿貧甚。今特賜卿銀二千五百兩。鈔二千五百貫。雄飛拜謝。將出。又詔加賜金五十兩。及金酒器。雄飛受賜。

封識藏於家。後阿合馬之黨。以雄飛罷政。乞追奪賜物。帝命近臣伯顏閱之。封識如故。

董士選。世祖時累官江淅行省右丞。遷汴梁行省平章政事。平生以忠義自許。尤號廉介。自門生部曲。無敢持一毫獻者。晚年好讀易。澹然終其身。每一之官。必賣先業田廬為行貲。故老而益貧。子孫不異布衣之士。仕者往往稱廉吏云。

國朝張以寧。少貧苦好學。洪武初為翰林侍讀。



學士。清潔自守。所居蕭然。未嘗營財產。嘗奉使安南。襍被而往。還遇疾卒於道。臨終有詩云。覆身惟有黔婁被。垂橐都無陸賈金。朝廷命有司。歸其喪。營葬以禮。

劉敏。洪武間為刑部侍郎。初為中書吏時。暮以小車出龍江市。蘆葦旦載于家。而後入蒞事。妻以蘆織席鬻以奉母。人或瞰其亡。以青瓷器遺其家者。敏懸于梁。俟其復來。竟還之。為楚相府錄事。值中書以沒官女婦給文臣。

家。衆咸勸其請給以事。母敏固辭曰。事母子婦事。何預它人。及奸權事敗。敏獨無所與。人稱其有行識云。

凌漢為監察御史。鞫獄平恕。人有德漢者。遇諸塗。邀漢飲。厚報以金。漢告曰。子罪當爾。律有定法。非我私子。酒可飲。而金不可受。時有廉得其事者以聞。

太祖皇帝嘉之。陞漢為右副都御史。

五倫書卷之五十二

五倫書卷之五十三

堯道

善行

謙讓

虞禹為司空帝命兼百揆禹拜稽首讓于稷契  
暨臯陶帝曰俞汝往哉

垂帝命曰汝共工垂拜稽首讓于殳斨暨伯  
與帝曰俞往哉汝諧

益帝命曰汝作朕虞益拜稽首讓于朱虎熊

羆帝曰俞往哉汝諧

伯夷帝命典三禮伯拜稽首讓于夔龍帝曰  
俞往欽哉

列國齊鮑叔牙事桓公桓公使之為宰對牙辭  
曰臣君之庸臣也若必治國家則非臣之所  
能也其惟管夷吾乎臣之所不如管夷吾者  
五寬惠愛民臣不如也治國不失柄臣不如  
也忠信可結於諸侯臣不如也制禮義可法  
於四方臣不如也介冑執枹立于軍門使百

姓皆加勇。臣不如也。夫管仲民之父母也。將欲治其子。不可棄其父母。

鄭子產以入陳之功。鄭伯賞之。享子展。賜之先路三命之服。先八邑。賜子產次路。再命之服。先六邑。子產辭邑。曰。自上下降殺以兩。禮也。臣之位。在四。且子展之功也。臣不敢及。賞禮請辭。邑公固與之。乃受三邑。公孫揮曰。子產其將知政矣。讓不失禮。

晉趙衰。文公使為卿。辭曰。藥枝貞慎。先軫有

謀胥臣多聞皆可以為輔臣弗若也公從之

原季晉文公使為卿辭曰夫三德者偃之出也。以德紀民其章大矣。不可廢也。乃使狐偃為卿。辭曰毛之智賢於臣。其齒又長。乃使狐毛將上軍。狐偃佐之。狐毛卒。使趙衰代之。辭曰。城濮之役。先且居之佐軍也。善軍伐有賞。善君有賞。能其官有賞。且居有三賞。不可廢也。且臣之倫。箕鄭胥嬰先都在。乃使先且居

將上軍公曰趙衰三讓其所讓皆社稷之衛也。廢讓是廢德也。以衰之故蒐于清源作五軍。使衰將新上軍箕鄭佐之胥嬰將新下軍先都佐之。

士丐晉侯使將中軍。辭曰伯游長昔臣習於智伯是以佐之。非能賢也。請從伯游使荀偃將中軍士丐佐之。使韓起將上軍。辭以趙武。又使欒黶。辭曰臣不如韓起。韓起願上趙武君其聽之。使趙武將上軍。韓起佐之。欒黶將



下軍。魏絳佐之。晉國之民是以大和。諸侯遂睦。君子曰。讓禮之主也。范宣子讓其下。皆讓。樂驥為汰。弗敢違也。

范文子。晉景公命卻克將中軍。欒書將下軍。以士燮代荀庚佐上軍。率師救魯衛。敗齊師于鞍而歸。文子後入。其父武子曰。無為吾望爾也乎。對曰。師有功。國人喜以送之。先入必屬耳目焉。是代師受名也。故不敢。武子曰。吾知免矣。卻克見公曰。子之力也。夫對曰。君之

訓也。二三子之力也。臣何力之有焉。文子見勞之如卻伯。文子對曰。庚所命也。克之制也。燮何力之有焉。欒伯見公亦如之。欒伯對曰。燮之詔也。士用命也。書何力之有焉。

秦公孫支事穆公。時公既得百里奚。公孫支乃致上卿以讓百里奚。曰。秦國處僻民陋。以愚危亡之本也。臣自知不足以處其上。請以讓之。公不許。公孫支曰。君不用賓相而得社稷之臣。君之祿也。臣見賢而讓之。臣之祿也。

今君既得其祿矣。而使臣失祿可乎。請終致之。公不許。公孫支曰。臣不肖而處上位。是君失倫也。不肖失倫。臣之過。進賢而退不肖。君之明也。今臣處位。廢君之德而逆臣之行也。臣將逃。公乃許之。故百里奚為上卿以制之。公孫支為次卿以佐之。

楚屠羊說以昭王失國從王於難。王反國將賞從者及屠羊說。說曰。大王失國。說失屠羊。大王反國。說亦反屠羊。臣之爵祿已復矣。又

何賞之有。王曰：強之。說曰：大王失國，非臣之罪。故不敢伏其誅。大王反國，非臣之功。故不敢當其賞。王曰：見之。說曰：楚國之法，必有重賞大功，而後得見。今臣之知不足以存國，而勇不足以死寇。吳軍入郢，說畏難而避寇，非故隨大王也。今大王欲廢法毀約而見說，此非臣之所以聞於天下也。王謂司馬子綦曰：屠羊說居處卑賤，而陳義甚高，子其為我延之以三旌之位。說曰：夫三旌之位，吾知其貴。

於屠羊之肆也。萬鍾之祿吾知其富於屠羊之利也。然豈可以貪爵祿而使吾君有妄施之名乎？說不敢當。願復反吾屠羊之肆，遂不受。

漢陳平。文帝初立，以平為相。平以太尉周勃功多，欲讓勃位。迺謝病。帝怪平病，問之。平曰：「高帝時，勃功不如臣，及誅諸呂，臣功不如勃。願以相讓勃。」

馮異為人謙退，與諸將相逢，輒引車避道。每

止頓諸將共論功伐。異常屏止樹下。軍中號  
大樹將軍。

桓榮光武欲用榮為博士。叩頭讓曰。臣經術  
淺薄。不如同門生郎中彭閎。揚州從事臯弘。  
帝拜榮為博士。引閎弘為議郎。榮明經義。每  
以禮讓相厭。不以辭長勝人。儒者莫之及。榮  
卒。子郁當襲爵。上書讓於兄子況。帝不許。不  
得已受封。而悉以租入與之。帝以郁先師子。  
有禮讓。甚見親厚。

鄭弘少為鄉嗇夫。太守第五倫行春見而深  
奇之。召署督郵。後代鄧彪為太尉。時倫為司  
空。班次在下。每正朔朝見。弘曲躬而自卑。明  
帝問知其故。遂聽置雲母屏風。分隔其間。由  
此以為故事。

鄧騭。平壽侯。訓之子。高密侯禹之孫也。安帝  
時。以定策功。封上蔡侯。增邑三千戶。騭辭不  
獲。遂逃避。使者問關。詔關自陳曰。臣兄弟汙  
穢。無分可採。過以外戚。遭值明時。並寵列侯。

光昭當世。誠慙誠懼。無以處心。陛下繼立皇  
統。奉承大宗。聖策定於神心。休烈垂於不朽。  
本非臣等所能萬一。而猥推嘉美。並享大封。  
退自惟念。不寒而慄。誠不敢橫受爵土。以增  
罪戾。疏上不聽。又上至五六。乃許之。

南宋劉懷慎武帝北伐。以為中領軍。宿衛輦轂。  
雖名位優重。而恭恪愈至。每所之造。位任不  
踰已者。皆束帶門外下車。其謙退類如此。  
後周蔡祐有膂力。便騎射。從征伐。常潰圍陷陣。



為士卒先。軍還之日。諸將爭功。祐終無所競。太祖每歎之。嘗謂諸將曰。祐口不言勲。孤當代其論叙。

隋高潁。賀若弼。平陳皆有功。一日文帝從容語及之。潁曰。賀若弼先獻十策。後於蔣山苦戰破賊。臣文吏耳。焉敢與武將論功。帝大笑。時論嘉其讓。

唐崔玄亮清慎介獨。自登朝行。不樂趨競。歷御史尚書。密湖曹三郡守。每一遷秩。譙讓輒形。

於色

宋呂蒙正為相時宰相子起家即授水部員外郎。蒙正奏曰。臣忝甲科及第。釋褐止授九品京官。況天下才能老於巖穴。不需寸祿者多矣。今臣男始離襁褓。膺此寵命。恐罹陰譴。乞以臣釋褐時官補之。自是宰相子止授九品京官。著為定制。

呼延贊少為驍騎卒。以功遷康州團練使。從真宗幸大名。為行宮內外都巡檢。真宗選補

軍校皆叙已功。或至誼譁。贊獨進曰。臣月俸百千。用不及半。忝幸多矣。自念無以報國。不敢更求遷擢。恐福過灾生。再拜而退。衆嘉其知分。

文彥博。英宗即位。起復成德軍節度使。三上表乞終喪。許之。初。仁宗不豫。彥博與富弼等乞立儲嗣。仁宗許焉。而後官將有就館者。故其事緩已。而彥博去位。既服闋。復以故官判河南。有詔入覲。英宗曰。朕之立。卿之力也。彥

博竦然對曰。陛下入繼大統。乃先帝聖意。皇太后協贊之力。臣何力之有。無陛下登儲纂極之時。臣方在外。皆韓琦等承聖志受顧命。臣無與焉。帝曰。備聞始議。卿於朕有恩。彥博遂謝不敢當。至神宗時。拜太尉。復判河南。於是王同老言。至和中議儲嗣事。彥博適入朝。神宗問之。彥博以前對英宗者復于帝。曰。先天命所在。神器有歸。實仁祖知子之明。慈聖擁佑之力。臣等何功。帝曰。雖云天命。亦係

人謀。卿深厚不伐善。陰德如丙吉。真定策社稷臣也。

王剛中。高宗時以龍圖閣待制知成都府制置四川。金敗盟。敵騎度大散關。人情洶洶。剛中跨一馬夜馳二百里。起吳璘於帳中責之曰。大將與國義同休戚。臨敵安得高枕而臥。璘大驚。又以蠟書抵張正彥濟師。西師大集。金兵敗走。方議奏捷。剛中倍道馳還。謂其屬李燾曰。將帥之功。吾何有焉。燾嘆曰。身督戰。

而功成不居過人遠矣

不欺

列國。齊晏嬰治東阿三年。景公召而數之曰。吾以子為可而使子治東阿。今子治而亂。子退而自察也。寡人將加大誅乎。嬰曰。臣請改道易行而治東阿。三年不治。臣請死。公許之。明年上計。公迎而賀之曰。善矣。子之治東阿也。嬰對曰。前臣之治東阿。屬託不行。貨賂不至。陂池之魚以利貧民。當此之時。民無飢者。而

君反以罪臣。今臣之治東阿也。屬託行貨賂至。左右陂池之魚入權家。民之貧飢者過半。君反迎而賀臣。臣願乞骸骨。公乃下席而謝曰。子強復而治之。東阿者子之東阿也。寡人無復與焉。

後魏高允為著作郎。時遼東公翟黑子有寵於太武。奉使并州。受布千匹。事覺。黑子謀於允曰。主上問我。當以實告。為當諱之。允曰。公惟幄寵臣。有罪首實。庶或見原。不可重為欺罔。

也。中書侍郎崔鑒公孫質曰。若首實罪不可測。不如姑諱之。黑子怨允曰。君柰何誘人就死地。入見帝。不以實對。帝怒殺之。帝使允授太子經。及崔浩以史事被收。事連及允。太子謂允曰。入見至尊。吾自導卿。脫至尊有問。但依吾語。太子見帝。言高允小心慎密。且微賤。制由崔浩。請赦其死。帝召允問曰。國書皆浩所為乎。對曰。臣與浩共為之。然浩所領事多總裁而已。至於著述。臣多於浩。帝怒曰。允罪



甚於浩。何以得生。太子懼曰。天威嚴重。允小臣迷亂失次耳。臣嚮問皆云浩所為。帝問允信如東宮所言乎。對曰。殿下以臣侍講日久。哀臣欲丐其生耳。實不問臣。臣亦無此言。帝顧謂太子曰。直哉。此人情所難而允能為之。臨死不易辭。信也。為臣不欺君。忠也。宜特除其罪以旌之。他日太子讓允曰。吾欲為卿脫死。而卿不從。何耶。允曰。臣與崔浩實同史事。死生榮辱義無獨殊。誠荷殿下再造之慈。違

心苟免非臣所願也。太子動容稱歎。允退。謂人曰。我不奉東宮指導者。恐負翟黑子故也。宋曹彬初為周世宗親吏。太祖始事世宗於澶州。彬掌茶酒。太祖嘗從彬求酒。彬曰。此官酒不敢相與。自沽酒以飲太祖。及即位。語羣臣曰。世宗舊吏不欺其主者。獨曹彬耳。由是委以腹心之任。

魯宗道為諭德時。居近酒肆。嘗微行就飲肆中。偶真宗亟召使者及門久之。宗道方自酒

肆來。使者先入。約曰。即上怪公來遲。何以為對。宗道曰。第以實言之。使者曰。然則公當得罪。曰。飲酒人之常情。欺君臣子之大罪也。帝果問。使者具以宗道所言對。至帝詰之。謝曰。有故人自鄉里來。臣家貧無杯盤。故就酒家飲。帝以為忠實可大用。常以語太后。太后臨朝。遂大用之。

呂夷簡。真宗時擢刑部員外郎。兼侍御史。知雜事。蜀賊李順叛。執送關下。左右稱賀。既而

屬御史臺按之。非是。賀者趣具順獄。夷簡曰：「是可欺朝廷耶？」卒以實奏。

寇準少英邁，年十九舉進士。太宗取人多，臨軒顧問，年少者往往罷之。或教準增年，答曰：「準方進取，可欺君邪？」竟以實對。

晏殊景德初，張知白安撫江南，以神童薦之。真宗召殊與進士千餘人並試廷中。神氣不懾，援筆立成。後二日復試詩賦論，殊奏：「臣嘗私習此賦，請試他題。」帝愛其不欺，既成，數稱。

善擢祕書省正字

胡宿仁宗時詳議官。開判院者當擇人薦於上。宿與同列得二人。一人者監稅河北。以水災虧課。同列議曰。虧課小失。不足白上。以累才。宿不可。至帝前。悉白之。且曰。此人小累。其才足惜。帝曰。果得才。小累何卹。遂除詳議官。同列退。謂宿曰。詳議欲得人。公苦欲白上。緣是不得柰何。宿曰。彼得與不得。一詳議官耳。是固亦有命也。宿以誠事主。今白首矣。不忍

絲髮欺君以負平生之節。為之開陳聽主上  
自擇耳。同列驚曰。某從公久。乃不知公所存  
如此。

李君行入京。至泗州留止。其子弟請先往。君  
行問其故。曰。科場近。欲先至京師。貫開封戶  
籍。取應。君行不許。曰。汝虔州人。而貫開封戶  
籍。欲求事君。而先欺君。可乎。寧遲緩數年。不  
可行也。

恬退

漢張良佐高帝定天下封留侯即導引不食穀杜門不出嘗曰家世相韓及韓滅不愛萬金之資為韓報讎疆秦天下震動今以三寸舌為帝者師封萬戶侯此布衣之極於良足矣願棄人間事欲從赤松子遊乃學辟穀導引。

董仲舒為膠東相以老病乞致仕武帝欲留用之不得朝廷每有大議輒遣廷尉張湯至其家問得失仲舒於是作春秋決獄二百三

十二事以對。時論高之。

疏廣為太子太傅。兄子受為少傅。太子每進見太傅在前。少傅在後。父子並為師傅。朝廷以為榮。廣謂受曰。吾聞知足不辱。知止不殆。功遂身退。天之道也。今仕宦至二千石。宦成名立如此。不去懼有後悔。豈如父子相隨出關。歸老故鄉。以壽命終。不亦善乎。即日父子俱移病上疏。乞骸骨。宣帝以其年薦老。皆許之。賜黃金二十斤。太子贈以五十斤。公卿大



夫故人邑子設祖道供張東都門外送者車數百輛道路觀者皆曰賢哉二大夫或歎息為之下泣

朱雲為槐里令既罷復建白欲斬佞臣張禹成帝直之自後不復仕薛宣為丞相雲往見之宣備賓主禮因留雲宿從容謂雲曰在田野無事且留我東閣可以觀四方奇士雲曰小生乃欲相吏耶宣不復敢言雲年七十餘終於家

鄭均為尚書以病乞骸骨拜議郎以歸章帝  
巡幸過任城幸均舍勅賜尚書祿以終身號  
白衣尚書

晉陶侃鎮武昌至季年懷止足之分不與朝權  
欲遜位居國佐吏等苦留之及疾篤將歸長  
沙軍資器仗牛馬舟船皆有定簿封印倉庫  
自加管鑰以付王愨期然後登舟朝野以為  
美談

陶潛以親老家貧謂親朋曰聊欲絃歌以為

三迂之資可乎。執事者聞之。以為彭澤令。郡遣督郵至縣。吏白應束帶見之。潛歎曰。我不能為五斗米折腰向鄉里小兒。即日解印綬去。賦歸去來辭。

南宋沈慶之封始興郡公。以年滿七十固請辭事。武帝嘉其意。許之。以為侍中。左光祿大夫。開府儀同三司。又固讓不許。表疏數十上。又面陳曰。張良名賢。漢高猶許其退。自有何用。必為聖朝所須。乃稽顙自陳。言輒泣涕。帝不

能奪聽以郡公罷就第

齊主僧虔以舊臣遷侍中左光祿大夫開府儀  
同三司僧虔謂兄子左僕射儉曰汝任重於  
朝行當有寵命之加我若復受此則一門二  
台司實所畏懼乃固辭客問其故僧虔曰吾  
榮位已過無以報國豈容更受高爵以貽官  
謗耶

唐李靖太宗時遣使十六道巡察風俗靖得畿  
內道會足疾懇乞骸骨帝遣中書侍郎岑文

本諭旨曰。自古富貴而知止者蓋少。雖疾頓  
憊。猶力于進。公今引大體。朕深嘉之。欲成公  
美。為一代法。不可不聽。授檢校特進就第。  
李日知先天中為刑部尚書。屢乞骸骨。玄宗  
許之。日知初不謀于家。既得請歸。即治行。妻  
驚曰。產利空空。何辭之遽。日知曰。仕至此。已  
過吾分。人亦何厭之有。若厭于心。無日而足  
也。既罷。不治田園。唯飾臺池。引賓客與娛樂  
而已。

宋韓維不好進。薦志問學。嘗以進士薦禮部。父任執政。不就。廷試。乃以父任。守將作監主簿。丁外艱。服除。闔門不仕。仁宗患縉紳奔競。諭近臣曰。恬退守道者旌擢。則躁求者自當知恥。於是宰相文彥博。宋庠等言。維好古嗜學。安於靜退。乞加甄錄。以厚風俗。召試學士院。辭不赴。除國子監主簿。

陳執中罷執政。判亳州。年六十九。生日。族子多獻老人圖為壽。其姪世脩獨獻范蠡圖。且

贊其上曰。賢哉陶朱。霸越平吳。名遂身退。扁舟五湖。執中甚喜。即日上疏求退。遂以司徒致仕。

龐籍知定州。請老。召還京師。籍陳請不已。或謂籍。今精力克壯。年必所不及。主上注意方厚。何遽引去。若此之堅。籍曰。必待筋力不支。明主厭棄。然後乃去。是不得已。豈知止足之謂耶。凡上表者。九手疏二十餘通。朝廷不能奪。聽以太子太保致仕。

范鎮舉進士。禮部奏名第一。故事。殿廷唱第。過三人。則首禮部選者必越次抗聲自陳。率得實上列。吳育。歐陽脩。號稱取介。亦從衆。鎮獨不然。同列屢趣之。不為動。至第七十九人。乃隨呼出應。退就列。無一言。廷中皆異之。自是舊風遂革。後拜翰林學士。時王安石行新法。上疏乞致仕。遂以戶部侍郎家居。凡所宜得恩典。悉不與焉。

邵雍與富弼早相知。富初入相。謂門下士曰。



三傳書卷三十三  
斐曰。為我問堯夫可出。當以官職起之。不即  
命為先生處士。以遂隱居之志。田為雍言。雍  
不答。以詩謝之。富終不相忘。乃因明堂祫享  
赦。詔天下舉遺逸。富意謂河南必以雍應詔。  
時文彥博尹洛。以兩府禮召見。雍不屈。嘉祐  
詔求遺逸。留守王拱辰以雍應詔。授將作監  
主簿。後復舉逸士。補潁州團練推官。皆固辭。  
卒。贈秘書省著作郎。謚康節。

蘇頌為集賢校理。富弼韓琦為相。務推尚廉。

退有德之士。以勸勵風俗。知頌頗久。次儒館。不干榮利。屢問所欲。惟力求外。以便親養。遂除知潁州。後弼遺頌書曰。若吾子出處可謂真古君子矣。

范祖禹以司馬光薦。編脩秘書省。時王安石當國。人皆奔競。祖禹未嘗往謁。安石弟安國與祖禹友善。嘗諭安石意。以祖禹獨不親附。故未進用。祖禹竟不往見。哲宗時。祖禹為翰林學士。帝欲相章惇。祖禹言。惇不可用。帝不悅。

祖禹遂乞郡。乃知陝州。其後以蔡卞之譖貶  
永澧黔州。復安置賀英州。祖禹平生澹然無  
欲。家人不見其喜怒之容。每被除擢。必力辭。  
不得已然後就職。及被貶謫。處之恬然。嘗曰。  
吾西蜀一布衣耳。今復不仕。何為不可。

元史天澤初拜中書左丞相。辭曰。臣兄天倪有  
二子。一子管民政。一子掌兵權。臣復叨寵遇。  
一門之內。處三要職。分所當辭。憲宗不許。後  
以李壇之反。由權太皇。天澤復言兵民之權。

不可併于一門行之請自臣始。即日子姪。解  
兵符者十七人。

董文用為衛輝路總管。至元間代歸田里。茅  
茨數椽。僅蔽風雨。閱書賦詩。怡然閑居。裕宗  
在東宮時。數言文用。勲舊忠良。何以不見用。  
於是臺臣復奏起為山北遼東道提刑按察  
使。文用竟辭不起。

五倫書卷之五十三